



KENYATAAN MEDIA

**MENTERI SUMBER ASLI DAN ALAM SEKITAR
YB DATO SRI DR. HAJI WAN JUNAIDI BIN TUANKU JAAFAR**

KES SIMPANAN HIDUPAN LIAR TANPA DOKUMEN SAH

17 FEBRUARI 2017

Seorang lelaki warga tempatan mengaku bersalah ke atas sembilan (9) pertuduhan di bawah Akta Pemuliharaan Hidupan Liar 2010 [Akta 716] pada 16 Februari 2017 di Mahkamah Sesyen Kajang kerana menyimpan beberapa hidupan liar yang dilindungi dan hidupan liar yang dilindungi sepenuhnya tanpa dokumen yang sah.

Pada 19 Oktober 2016, lelaki yang berumur 51 tahun itu telah ditangkap oleh penguatkuasa Jabatan PERHILITAN kerana menyimpan pelbagai spesies hidupan liar yang dilindungi di bawah Akta 716 tanpa suatu dokumen yang sah di premis kediamannya di Kajang, Selangor. Hidupan liar tersebut ialah satu (1) ekor harimau belang (*Panthera tigris*) betina, satu (1) ekor kucing batu (*Prionailurus bengalensis*) betina, satu (1) ekor burung Helang Merah (*Haliastur indus*), satu (1) ekor burung Gagak Gunung (*Cissa chinensis*), dua (2) ekor burung Murai Jambul Putih (*Copsycus stricklandii*), satu (1) ekor Schneider's Dwarf Caiman (*Paleosuchus trigonatus*), satu (1) ekor Pelanduk (*Tragulus javanicus*), satu (1) ekor burung Tiong Mas (*Gracula religiosa*) dan satu (1) ekor burung Murai Batu (*Copsychus malabaricus*).

Pihak pendakwaan diwakili oleh Timbalan Pendakwa Raya Puan Ainul Mardiyah dan dibantu oleh pegawai pendakwa Jabatan PERHILITAN Encik Nazarudin Bin Kamarudin telah mendakwa tertuduh dengan sembilan (9) pertuduhan di bawah Seksyen 60(1)(a), Seksyen 68(1)(a), Seksyen 70(1) dan Seksyen 70(2), Akta Pemuliharaan Hidupan Liar 2010 [Akta 716].

Tertuduh mengaku bersalah terhadap kesemua pertuduhan yang dibacakan di hadapan Hakim Puan Noridah binti Adam dan mahkamah telah menjatuhkan hukuman denda dan penjara keseluruhan berjumlah RM550 ribu dan empat (4) bulan penjara daripada tarikh tertuduh ditangkap.

Sehubungan itu, Jabatan PERHILITAN mengingatkan orang awam terutamanya mereka yang berminat untuk menjalankan aktiviti berkaitan hidupan liar agar mematuhi undang-undang yang berkuatkuasa dan merujuk Jabatan PERHILITAN terlebih dahulu berkaitan keperluan untuk mendapatkan lesen, permit dan permit khas hidupan liar.

Kepada individu yang masih menyimpan atau memiliki hidupan liar secara haram tanpa suatu dokumen yang sah daripada Jabatan PERHILITAN dinasihatkan agar tampil membuat serahan dan memberi kerjasama kepada Jabatan PERHILITAN sebelum tindakan penguatkuasaan diambil.

Orang ramai diharapkan untuk terus memberikan sokongan dan membantu dengan menjadi mata dan telinga Jabatan PERHILITAN melalui penyaluran maklumat dalam usaha melindungi khazanah negara supaya tidak diancam kepupusan. Maklumat boleh disalurkan melalui PERHILITAN Hotline 1-800-88-5151 (Isnin- Ahad, 8.00 pagi – 6.00 petang) atau e-aduan melalui laman web Jabatan di www.wildlife.gov.my.